



典故紀聞

一





聞紀故典

(一)

余繼登輯

# 明史本傳

余繼登字世用交河人萬曆五年進士改庶吉士授檢討與修會典成進修撰直講經筵尋進右中允充日講官時講筵久輟侍臣無所納忠繼登與同官馮琦共進通鑑講義傳以時政缺失歷少詹事兼侍讀學士充正史副總裁已擢詹事掌翰林院兩宮災偕諸講官引洪範五行傳切諫不報進禮部右侍郎二十六年以左侍郎攝部事陝西山西地震南都雷火西寧鐘自鳴紹興地湧血繼登於歲終類奏因請罷一切誅求開採之害民者時不能用雷擊太廟樹復請帝躬郊祀廟享冊立元子停礦稅撤中使帝優詔報聞而已旋擢本部尙書時將討播州楊應龍繼登請罷四川礦稅以佐兵食復上言頃者星躔失度水旱爲沴太白晝見天不和也鑿山開礦裂地求砂致狄道山崩地震地不和也閭閻窮困更加誅求帑藏空虛復責珠寶奸民蟻聚中使鴟張中外壅隔上下不交人不和也戾氣凝而不散怨毒結而成形陵谷變遷高卑易位是爲陰乘陽邪干正下叛上之象臣子不能感動君父言愈數愈厭故天以非常之變警悟陛下尚可安然不爲意乎帝不省繼登自署部事請元子冊立冠婚疏累上以不得請鬱鬱成疾每言及輒流涕曰大禮不舉吾禮官死不瞑目病滿三月連章乞休不許請停俸亦不許竟卒於官贈太子少保謚文恪繼登樸直慎密寡言笑當大事言議侃侃居家廉約學士曾朝節嘗過其里蓬蒿滿徑及病革視之擁粗布衾羊毳覆足而已幼子應諸生試夫人請爲一言終不可

# 序

余與世用偕官史局。別僦舍而共處。稍謝造請。取古人已事差次之。而世用曰。取法於遠。不如近也。卽又取當代事爲一編。而世用曰。吾與其繁也。寧簡事可循。言可紀。不必見自己出也。以魏弱翁之才。其大者乃在條上。漢家諸名臣故事耳。余以爲與其取諸名臣奏牘。不如徵列聖之典謨也。於是世用視諸故府。紀所見聞。久而成帙。屬余更定。攜爲十八卷。凡關國家大政大本則書。非大事而於世爲急則書。非大非急。而爲異聞。見則書。非異而事所從起。則書。中丞王公取以付梓。人刻未竟。而世用卒。嗟哉。世用所論。次未及施用也。然可謂有其意矣。

賜進士出身通議大夫吏部右侍郎兼翰林院侍讀學士國史玉牒副總裁前詹事府少詹事掌院事直  
起居注經筵日講官北海馮琦序。

# 典故紀聞卷一

明 交河余繼登緝

太祖攻陳墾先時方假寐有蛇緣臂而走左右驚告視之蛇有足類龍而無角意其神也祝之曰若神物則棲我帽纓中蛇徐入纓中太祖舉帽戴之遂詣敵營設詞諭降寨帥旣歸忘前蛇坐久方寤脫帽視之蛇居纓中自若迺引觴自酌因以飲蛇蛇亦飲遂蜿蜒繞神檻矯首四顧復俯神主頂若鏤刻狀久之升屋而去

太祖克采石諸將見糧畜各欲資取而歸因令悉斷舟纜推置急流中舟皆順流東下諸軍驚問故太祖曰成大事者不規小利今舉軍渡江幸而克捷當乘勝徑取太平若各取財物以歸再舉必難大事去矣於是率諸軍進取太平

太祖攻太平先令李善長爲戒戢軍士榜及拔城卽張之士卒方剽掠見榜愕然不敢動有一卒違令卽斬以徇城中肅然

陳墾先攻太平太祖按兵城上令徐達等轉戰至城北忽有雙龍見於陣上雲端敵衆驚愕仰視我師因大破之遂擒墾先

太祖擒陳兆先降其衆擇其驍勇者五百人置麾下五百人疑懼不自安太祖覺其意至暮悉令人衛屏

舊人於外解甲酣寢。衆乃相謂曰：「旣活我，又以腹心待我，何可不盡力圖報？」及攻安慶，多先登。

太祖旣定金陵，欲發兵取鎮江，召諸將徐達等將兵往戒之曰：「吾自起兵未嘗妄殺汝等，當體吾心，戒戢士卒，城下之日毋焚掠，毋殺戮，有犯令者處以軍法。縱之者罰無赦。」諸將頓首受命。及克鎮江，城中晏然，民不知兵。

太祖初設營田司，以元帥康茂才爲營田使，諭之曰：「理財之道，莫先於農。春作方興，慮旱澇不時，有妨農事，故命爾此職。分巡各處，俾高無患乾卑，不病澇務在蓄洩得宜。大抵設官爲民，非以病民。若但使有司增飾館舍，迎送奔走所至，紛擾無益於民而反害之，非付任之意。」

太祖爲吳王時，命按察司僉事分巡郡縣錄囚左右，或言去年釋罪囚今年又從末減，用法太寬，則人不懼法，法縱弛無以爲治。上曰：「用法如用藥，藥本以濟人，不以斃人。服之或誤，必致戕生。法本以衛人，不以殺人。用之太過，則必致傷物。百姓自兵亂以來，初離創殘，今歸於我，正當撫綏之，況其間有一時誤犯者，寧可盡法乎？大抵治獄以寬厚爲本，少失寬厚，則流入苛刻矣。所謂治新國，用輕典，刑得其當，則民自無冤抑。若執而不通，非合時宜也。」

太祖爲吳王，卽立管領民兵萬戶府，諭省臣曰：「古者寓兵於農，有事則戰，無事則耕，暇則講武。今兵爭之際，當因時制宜，所定郡縣，民間豈無武勇之材，宜精加簡拔，編緝爲伍，立民兵萬戶府領之。俾農時則耕閑，則練習，有事則用之。事平有功者，一體陞擢；無功者，令還爲民。則民無坐食之弊，國無不練之兵，庶幾

寓兵於農之意也。

太祖自宣至徽。儒士唐仲實、姚連來見。因言主公開創之功，超於前代。然今日民雖得所歸，而未遂生息。太祖曰：此言是也。我積少而費多，取給於民，甚非得已。亦皆爲軍需所用。未嘗以一毫奉己。民之勞苦，恆思所以休息之。曷嘗忘也。

太祖攻婺城未破。先一日有五色雲見城西。氤氳似蓋。城中望之以爲祥。及城下乃知爲駐蹕之地。儒士范祖幹初見太祖。持大學以進。曰：帝王之道。自修身齊家。以至於治國平天下。必上下四旁。均齊方正。使萬物各得其所。而後可以言治。太祖曰：聖人之道。所以爲萬世法。吾自起兵以來。號令賞罰。一有不平。何以服衆。武定禍亂。文致太平。悉此道也。

太祖爲吳王時。召儒士許元、葉瓊玉、胡翰、吳沈、汪仲山、李公常、金信、徐孳、戴良、童翼、吳履、張起敬、孫履。皆會食省中。日令二人進講經史。敷陳治道。

太祖旣定寧越。欲取浙東諸郡。集諸將諭之。曰：仁義足以得天下。而威武不足以服人心。夫克城雖以武。而安民必以仁。吾師比入建康。秋毫無犯。一舉而遂定。今新克婺城。民始獲甦。正當撫卹。使民樂於歸附。則彼未下郡縣。亦必聞風而歸。吾每聞諸將下一城。得一郡縣。不妄殺人。輒喜不自勝。蓋師旅之行勢如烈火。火烈則人必避之。故鳥不萃鷹鵠之林。獸不入網羅之野。民必歸寬厚之政。爲將者能以不殺爲心。非惟國家所利。在己亦蒙其福。爲子孫者亦必昌盛。

太祖起兵時所招安郡縣將士皆徵糧於民名曰寨糧民甚病焉胡大海以爲言遂罷之太祖爲吳王時方國珍以金玉飾馬鞍來獻太祖曰吾方有事四方所需者文武材能所用者穀粟布帛其他寶玩非所好也卻其獻

太祖視事東閣天熱甚汗溼衣左右更衣以進皆經漑濯者參軍宋思顏曰主公躬行節儉真可示法子孫臣恐今日如此而後或不然願始終如此太祖喜曰此言甚善他人能言或惟及於目前而不能及於久遠或能及於已然而不能及於將然今思顏見我能行於前而慮我不能行於後信能盡忠於我也乃賜之幣

句容有虎爲民害者太祖遣人捕獲之令養於民間飼以犬宋思顏以爲擾民無益太祖欣然卽命取二虎一熊殺之分其肉賜百官

越國公胡大海嘗言吾武人不讀書然吾行軍惟知有三事不殺人不虜人婦女不焚毀人廬舍故其軍一出遠近皆趨附之可爲行兵者之法

僉院常遇春守金華其部將有擾民者衢州總制王愷執而撻之市遇春怒使人讓之愷曰民者國之本將軍上股肱肯令傷其本乎撻一部將而萬民安亦將軍所樂聞也遇春謝之

太祖初命諸將於龍江等處屯田惟康茂才所屯充牣乃下令申諭諸將曰興國之本在於強兵足食昔漢武以屯田定西戎魏武以務農足軍食定霸興王莫不由此兵興以來民無寧居連年饑饉田地荒蕪

若兵食盡資於民則力重困故令爾將士且耕且戰數年以來未見功績惟茂才所屯得穀一萬五千餘以給軍餉尙餘七千以此較彼地力均而入有多寡蓋人力有勤惰故耳自今宜及時開墾以收地利庶兵食充足國有所賴

太祖謂中書省臣曰自古聖帝明王建邦設都必得賢士大夫相與周旋以成至治今土宇日廣文武並用卓犖奇偉之士世豈無之或隱於山林或藏於士伍非在上者開導引拔之則在下者無以自見自今有能上書陳言敷宣治道武略出衆者參軍及都督府俱以名聞若其人雖不能文章而識見可取許謁闈面陳其事吾將試之

太祖謂左相國徐達曰禮法國之紀綱禮法正則人志定上下安建國之初此爲先務吾昔起兵濠梁見當時之將皆無禮法恣情任私縱爲暴亂不知馭下之道是以卒至於亡今吾所任將帥卽與定名分明號令故諸將皆聽命爾等爲吾輔相當守此道無謹於始而忽於終也

太祖嘗謂羣臣曰剽悍驕暴非人之性也習也苟有禮法以一之則剽悍者可使善柔驕暴者人使循帖若踶噏之馬調御有道久則自然馴熟屬茲草創苟非禮法人無所守然制禮立法非難遵禮守法爲難此方今所當急者

太祖嘗曰論道經邦輔弼之臣折衝禦侮將帥之職論思獻納侍從之任激濁揚清臺察之司此數者朝廷之要職也至於繩愆糾繆拾遺補過諫諍之臣尤難其人抗直者或過於矯激巽懦者又無所建明必

國爾忘家。公爾忘身。方可任之。不然。患得患失之徒。將何所賴也。

太祖與諸將論用兵方略。因曰。汝等非不善戰。然臨事決機智或不足。宜親近儒者。取古人之書。聽其議論。以資智識。

太祖見陳友諒鏤金牀曰。此與孟昶七寶瀨器何異。卽命毀之。侍臣曰。未富而驕。未貴而侈。所以取敗。太祖曰。旣富豈可驕。旣貴豈可侈。有驕侈之心。雖富貴。豈能保。處富貴者。正當抑奢侈。宏儉約。戒嗜慾。猶恐不足以慰民望。況窮天下之技巧。以爲一己之奉乎。其致亡也。宜矣。覆車之轍。不可蹈也。

太祖嘗謂羣臣曰。治國之道。必先通言路。言猶水也。欲其長流水。塞則衆流障遏。言塞則上下壅蔽。今子以一人酬應天下之務。非兼聽廣詢。何以知其得失。詩曰。先民有言。詢于芻蕘。夫芻蕘至賤者也。古人尚有取於其言。况左右前後之人。與我共事者。豈無一得之長乎。諸公有所建明。當備陳之。又曰。國家政治得失。生民之休戚繫焉。君臣之間。各任其責。所行未當。卽當速改。不宜有所隱避。若隱避而不言。相爲容默。非事君之道。於己亦有不利。自今宜各盡乃心。直言無隱。

太祖嘗謂中書省臣曰。立國之初。致賢爲急。中書百司綱領。總率羣屬。非擇賢者與之共理。但任人之道。大小輕重。各適其宜。若委重於輕。是以枳桷而爲梁棟。委大於小。是以鍾庚而盛斗筲。省臣對曰。人有才者。施於任使。宜無不可。太祖曰。莫邪之利。能斷犀象。以之斷石。則必缺。駢驥之駛。能致千里。以之服乘。則必蹶。要必處之得其宜。用之盡其才。可也。

太祖聞諸功臣家僮僕多有橫肆者召徐達等諭之曰爾等從我起身艱難雖成此功非旦夕所致比聞爾等所畜家僮乃有恃勢驕恣逾越禮法此不可不治也小人無忌不早懲治之他日或生釁隙豈不爲其所累如治病當急去其根若隱忍姑息終爲身害

太祖時曾下令凡農民田五畝至十畝者栽桑麻木縣各半畝十畝以上倍之其田多者率以是爲差有司親臨督勤惰不如令者有罰不種桑使出絹一匹不種麻及木縣出麻布縣布各一匹按此令常行民安有不足於衣者

太祖嘗命中書省錄用諸司勅退官因謂省臣曰人之才能各有長短故治效有遲速夫質朴者多迂緩狡猾者多便給便給者雖善辦事或傷於急促不能無損於民迂緩者雖於事或有不逮於民則無所損也

太祖以儒士楊訓文爲起居注諭之曰起居之職非專事紀錄而已要在輸忠納誨致主於無過之地而後爲盡職也吾平時於百官所言一二日外猶尋繹不已今爾在吾左右可不盡言他日復命訓文膝教集古無道之君若夏桀商紂秦皇隋煬帝所行之事以進曰往古人君所爲善惡皆可以爲龜鑑吾所以觀此者欲知其喪亂之由以爲戒耳

太祖嘗下令曰王者之於士卒既用其力當卹其老而寡妻弱子尤宜優卹予自兵興十有餘年所將之兵攻取四方勤勞至矣以其爲親兵也故遵守外郡以佚之其有老羸嘗被創者令其休養營中死事物

故者妻子皆月給衣糧賑贍之若老而思慕鄉土聽令於應天府近便居止庶去鄉不遠以便往來所給衣糧悉如其舊

太祖嘗謂太史令劉基等曰國家愛養生民正猶保赤子惟恐傷之苟無常制惟掊斂以脰其脂膏雖有慈父不能收愛子之心今日之計當定賦以節用則民力可以不困崇本而祛末則國計可以恆紓太祖將營宮室典營繕者以圖進見其有雕琢奇麗者卽去之謂中書省臣曰宮室但取其完固而已何必過爲雕斲昔堯茅茨土堵采椽不斷可謂極陋矣然千古稱盛德者以堯爲首後世競爲奢侈極宮室苑囿之娛窮輿馬珠玉之玩慾心一縱卒不可遏亂由是起夫上能崇節儉則下無奢靡吾嘗謂珠玉非寶節儉是寶有所繙構一以朴素何必雕巧以殫天下之力也

吳元年其省局匠告省臣云見一老人言吳王卽位三年當平一天下問老人爲誰曰我太白神也言訖遂不見省臣以聞太祖曰此誕妄不可信若太白神果見當告君子豈與小人語耶今後凡事涉怪誕者勿以聞

太祖嘗諭按察司僉事周演曰風憲紀綱之司惟在得人則法清弊革然凡事當存大體苟察察以爲明苛刻以爲能下必有不堪之患非吾所望於風憲也

太祖嘗禁種糯其略言曩以民間造酒糜費故行禁酒之令今春米價稍平頗有益於民然不塞其源而欲遏其流不可也其令農民今歲無得種糯以塞造酒之源欲使五穀豐積而價平居民得所養以樂其

生庶幾養民之實也。

太祖嘗念仁祖太后始葬時禮有未備議欲改葬問博士許存仁等改葬當何據對曰禮改葬易常服用總麻葬畢除之乃命有司制素冠白縷衫絰皆以粗布爲之起居王禕曰此比總麻爲重矣太祖曰與其輕也寧重時有言改葬恐泄山川靈氣者乃不復改

太祖嘗謂中書省臣曰吾昔在軍中嘗乏糧空腹出戰歸得一食雖甚粗糲食之甚甘今尊居民上飲食豐美心未嘗忘之況吾民居於田野所業有限而供需百出豈不重困於是免太平等府租賦有差太祖嘗謂中書省臣曰古人祝頤其君皆寓警戒之意適觀羣下所進箋文頤美之詞過多規戒之言未見殊非古者君臣相告以誠之道今後箋文只令文意平實勿以虛詞爲美

太祖嘗命有司訪求古今書籍藏之祕府以資覽閱因謂侍臣詹同曰三皇五帝之書不盡傳於世故後世鮮知其行事漢武帝購求遺書而六經始出唐虞三代之治始可得而見甚有功於後世吾每於宮中無事輒取孔子之言觀之如節用而愛人使民以時眞治國之良規孔子之言萬世之師也

博士許存仁講尚書洪範至休徵咎徵之應太祖曰天道微妙難知人事感通易見天人一理必以類應稽之往昔君能修德則七政順度雨暘應期災害不生不能修德則三辰失徵旱潦不時乖異迭見其應如響今宜體此下修人事上合天道

吳元年上海民錢鶴皋作亂執華亭知縣馮榮榮不屈囚置獄中及徐達遣指揮葛俊擒鶴皋榮始出獄

卽爭於俊曰。反者鶴皋耳。餘皆良民。卽有從者。亦皆迫脅。將軍必欲加兵。桀請先死。有邑無民。何以爲治。俊從之。全活甚衆。

前代朝賀皆用女樂。我太祖吳元年始革去不用。

太祖嘗謂憲臣曰。任官不當。則庶事不理。用刑不當。則無辜受害。辟之薈草萊者。施鉛不謹。必傷良苗。繩姦慝者。論法不當。必傷善類。故刑不可不慎也。夫置人於鑿楚之下。屈抑頓挫。何事不伏。何求不得。古人用刑。蓋不得已。懸法象魏。使人知而不敢犯。辟之水火。能焚溺人。狎之則必傷。遠之則無害。水火能生人。亦能斃人。刑本生人。非求殺人也。苟不求其情。而輕用之。受枉者多矣。故欽恤二字。用刑之本也。

太祖時除郡縣官皆給道里費。知府五十兩。知州三十五兩。知縣三十兩。同知視知府五之三。通判推官五之二。州同知視府。通判經歷。州判視府。同知半之。縣丞主簿視知縣半之。典史十兩。著爲令。又予文綺羅絹布。及其父母妻子皆有差。蓋謂初授官不免假貸於人。或侵漁百姓。故欲其奉公。不得不先養其廉如此。

太祖因試將士。諭之曰。汝等知弓力乎。其力但能至百步。百步之外。又加五步焉。不能入矣。故善射者求

中於百步之內則弓無敗折之患。馭馬亦然。其力能至百里。百里之外加十里焉。則馬力疲矣。故善馭馬者常使其力有餘而不盡。則馬無蹶傷之失。況攻戰之際。馬功居多。平原曠野。馳騁上下。無不從志。克敵追奔。所向無前。皆在馬力。若不善於調養。使其力乏。則臨陣之際。必致敗事。無以成功矣。因下令將士不得私乘戰馬及載他物。違令者罪之。

太祖以久不雨減膳素食。謂近臣吳去病曰。予以天旱故率諸宮中皆令素食。使知民力艱難。往時宮中所需蔬茹醯醬。皆出大官供給。今皆以內官爲之。懼其煩擾於民也。吏有受賊者。事覺赴井死。太祖聞之。諭羣臣曰。彼知利之利。而不知利之害。徒知愛利。而不知愛身。人之愚孰有甚於此。君子聞義則喜。見利則恥。小人見利則喜。聞義不從。是故君子舍生取義。小人則舍生爲利。所爲相反。今其人死不足卹。其事可爲世之貪汚者戒。

太祖嘗召浙西降將諭之曰。吾所用諸將多濠泗汝颍諸州之人。勤苦儉約。不知奢侈。非比浙江富庶。耽於逸樂。汝等亦非素富貴之家。一旦爲將。握兵多取子女玉帛。非禮縱橫。今當革去舊習。如吾濠泗諸將。庶可常保爵位。若肆志一時。慮不顧後。雖暫得快樂。旋復喪敗。何足爲眞富貴乎。

吳元年七月己丑。雷震宮門。獸吻得物。若斧形而石質。太祖命藏之。出則使人負於駕前。臨朝聽政。則奉置几案。以祇天戒。

太祖諭羣臣曰。古之賢君。常憂治世。古之賢臣。亦憂治君。賢臣之憂治君者。君常安。明主之憂治世者。世

常治今土宇日廣斯民日蕃而予心未嘗一日忘其憂蓋以久困之民未盡蘇息撫綏之方未盡得宜卿等能同予之憂乎能同予憂庶幾格天心而和氣可致矣若竊位苟祿於生民利病漫不加省卒之禍敗隨至不可得而救矣可不懼哉

太祖一日祀山川畢出齋次顧謂世子等曰人情貴則必驕逸則忘勞聖人所以戒盈滿而謹怠荒夫貴而不驕逸而知勞智周萬物心體衆情斯爲人上之道故天道下濟而歲功成人道克敏而德業著歷觀往古取法於上而治化於下者皆由於此今國家初定民始息肩汝能知其勞乎能諳人情則不至驕惰今將士中夜而起扈從至此皆未食汝可步歸庶諳勞逸他日不致驕惰

太祖謂臺省臣曰近代法令極煩其弊滋甚今之法令正欲得中勿襲其弊如元時條格煩冗吏得夤緣出入爲奸所以其害不勝且以七殺言之謀殺故殺鬪毆殺旣皆死罪何用如此分析但誤殺有可議者要之與戲殺過失殺亦不大相遠今立法正欲矯其舊弊大概不過簡嚴簡則無出入之弊嚴則民知畏而不敢輕犯爾等其體此意

太祖御白虎殿諭羣臣曰自古忠賢之士大概有三輔國安邦孜孜圖治從容委曲勸君爲善君雖未聽言必再三人君感悟而聽用之則朝廷尊安庶務咸理至於進用賢能使野無遺逸黜退邪佞處置當法而人不敢怨此上等之賢也博習古人之言深知已成之事其心雖忠於輔國而骨中無機變之才是古非今膠柱鼓瑟而強人君以難行之事然觀其本情忠鯁亦可謂端人正士矣屢遭斥辱其志不怠此亦

忠於爲國，乃中等之賢也。又有經史之學，雖無不通，然泥於古人之陳迹，不識經濟之權衡，智中混然不能辨別，每揚言高論，以爲進諫，竟不知何者宜先，何者宜後，何者可行，何者不可行。凡其謀事，自以爲當，而實不切於用。人君聽之，則以之自高，不聽，則謂不能行其言，既無益於國家，徒使人君有拒諫之名，然其心亦無他，不識時達變耳。此下等之賢也。予今論此三者，有識者自見耳。

太祖謂省臣曰：「鞠獄當平恕，非大逆不道罪止及其身，先王之政，罪不及孥。」罰勿及嗣，忠厚之至也。自今民有犯者，毋連坐。參政楊憲言：「民輕犯法，則犯者益衆。」太祖曰：「民之爲惡，猶衣之有積垢，加以滌濯，則可以復潔；污染之民，以善導之，則可以復新矣。夫威以刑戮而使民不敢犯，其爲術也淺，且求生於重典，是猶索魚於釜，得活甚難。」凡從輕典，雖不求其生，自無死之道。

太祖新建宮殿成，命儒士熊鼎編類古人行事，可爲鑒戒者，書於壁間。又命侍臣書大學衍義於西廡壁間，曰：「前代宮室多施繪畫，予用此以備朝夕觀覽，豈不愈於丹青乎？」國初建宮殿時，有言瑞州出文石，可琢以贊地者。太祖曰：「敦崇儉朴，猶恐習奢，好尚華美，豈不過侈爾？不能以節儉之道事予，乃導予以侈麗，夫豈予心哉？但構爲宮室，已覺作者之勞，況遠取文石，能不厲民乎？」言者大慚而退。

南京新造宮殿成，太祖謂中書省臣曰：「軍士多有因戰鬪而傷殘者，既不可備行伍，今新宮成，當設備禦，可於宮牆外周圍隙地，多造廬舍，令廢疾者居之，晝則治生，夜則巡警，因給糧以贍之，庶得有所養也。」國初習元舊，俱尚右。至吳元年十月，太祖始命百官禮儀俱尚左，改右相國爲左相國，餘官如之。